

Legendario Charles Arrindell di San Fernando Boys a fayece



Por bisa cu **Charles Arrindell** a toca como mucha como un di e prome musiconan di musica di carnaval di nos isla, hunto cu su tata **Jules François Arrindell** y rumannan **Fernando, Henry, Francisco, y George**. Charles a fayece na St. Maarten fin di siman cu a pasa, y e dianan aki lo wordo dera, sea na St. Maarten of na Aruba. Riba un di e potretan por mira Charles tocando marimba den baña cu su tata y rumannan tempo e tabata mucha. San **San Fernando Boys** ta e grupo musical cu a habri caminda pa duna bon bini na turistanan di nos isla riba waf. Un grupo cu nunca a cóbra, pero tabata haya nan entrada di e placa cu turistanan tabata tira pa nan for di bapor pa riba waf, of cu tabata deposita pa nan banda di e banda ora cu nan ta subi of baha di bapor. Despues di waf, e tabata tabata bay cu su yiunan na **Basi Ruti bieu di Neme**, pariba di loke a bira boulevard, unda nan tabata toca pa turistanan y despues di tempo pa e **Basi Ruti** nobo pabao di loke a bira Boulevard. San Fernando a toca pa turistanan di **Santa Rosa** y e otro bapornan

"santa" tambe na loke tabata conoci como **Palm Beach Club**, unda awe ta **Westin**. Fundeshi di e club aki tabata bao di e matanan unda nos hendenan tabata sinta añanan largo gozando di e beach.

Nan a toca na **Aruba Caribbean Hotel** hopi aña pa turistanan y despues pa **Sheraton Hotel** cu a bira **Grand Hotel** despues y unda awe tin **Riu hotel**, prome cu nan a bay establece nan mes na St. Maarten. **San Fernando Boys** cu **Papa Jules** riba acordeon, **Charles** riba marimba, **Fernando** riba tambora, **Francisco** riba paradera, **George** riba campana y **Henry** riba wiri tabata e prome banda cu a toca den paradanan na **San Nicolas** y despues a bira tambe e prome banda cu a usa sistema di sonido riba truck, prome cu otro bandanan a cuminsa participa den e paradanan hunto cu steelbandnan.

George a fayece algun aña pasa y awor a tende cu **Charles** tambe a fayece. E tata a siña tur e yiunan pa toca diferente instrumento musical, y nan a specializa den guitarra, tre, baho, acordeon, saxophone, trompet, keyboard entre otro.

Na St. Maarten despues di tempo a rumannan a forma nan mes agrupacion te cu recientemente nan tabata tin "**San Fernando Brothers**" cu cual nan a logra varios grabacion. Riba un di e potretan por mira e rumannan, **Charles** cu tabata saxophonista, **Fran-**

cisco cu ta canta y toca guitarra, **Felocito** cu ta canta y toca baho, **Elmando** cu t toca keyboard y drum, y cantante di e grupo tabata **Francía Margarita Leger**.

Charles su intencion tabata pa a bishita Aruba e siman aki pa asina bishita su mama cu ta residencia na Aruba, pero no a logra haci e biahe debi na su fayecimento. El a fayece cu 67 aña di edad.

San Fernando Boys cu **Charles** y rumannan hunto cu nan tata tabata masha conoce pa nan toca nan na **San Nicolas** pa diferente fiesta, tanto di familianan, organizacionnan y clubnan. Nan tabata toca hopi na **Charles Poolroom** den Village, na Juana Morto unda **Yrad Illidge** tambe tabata forma parti di canto cu nan. **Yrad Illidge** ta difunto **Lord Boxoe** cu tabata bisina cibando patras di cas di familia **Arrindell** e tempo ey. Nan tabata popular tocando den **Lago Club** y **Lago Heights Club** pa actividadnan festivo.

Especialmente e merengue dominicano cu tambora tabata e especialidad di **San Fernando Boys**, y den **San Nicolas** combina cu e calypso tabata loke **San Nicolas** a biba cune cu e grupo aki y otro gruponan na final di decada 40 pa principio di decada 60.

Ultimo dianan por a nota na esnan cu a conoce **Charles**, cuanto nan a lamenta su fayecimento ya cu di tempo e tabata biba na Aruba e tabata un figura masha aprecia tur caminda. Ta bon pa menciona aki tambe cu **Charles** y su



rumannan, **San Fernando Brothers** tabata e agrupacion considera como netamente arubano cu a wordo invita pa apertura di e club di arubianonan na St. Maarten. Entiero di **Charles** no tin fecha ainda y su yiunan

lo tin cu dicidi riba lugar di entierro, sea ta na St. Maarten mes of na Aruba unda su mama ta biba ainda... Cu **Charles** sosega na paz y forza na su familia, su mama y su rumannan.

Juby Naar.

TELEFONNAN DI DIARIO
582-6747- FAX 582-8551